

四庫全書

集部

欽定四庫全書

五百家播芳大全文粹卷八十九

宋 魏齊賢

葉 棻同輯

樂語

御宴

紫宸殿正旦大宴教坊

蘇子瞻

臣聞行夏之時正莫加於人統採周之舊王方在於鎬

京惟吉月之布和休庶工而未作使華遠集鄰好交修
萃簪笏於九門來車書於萬里將興嗣歲以樂太平恭
惟皇帝陛下躬履至仁誕膺眷命法天地四時之運民
日用而不知傳祖宗六聖之心我無為而自化九德咸
事三年有成始御八音之和以臨元日之會人神相慶
夷夏來同臣等忝與賤工得親壯觀知輿情之願頌顧
盛德之難形不度荒蕪敢進口號

九霄清蹕一聲雷萬物欣榮意已開曉日自隨天仗出

春風不待斗杓回行看菖葉催耕籍共喜椒花映壽杯
欲識太平全盛事振振鵷鷺滿雲臺

勾合曲

東風應律南籥在庭餞臘迎春方慶三朝之會登歌下
管願聞九奏之和上悅天顏教坊合曲

勾小兒隊

工師奏技咸踴躍以在庭稚孺聞音亦回翔而赴節方
資共樂豈間微情上奉宸歡教坊小兒入隊

隊名

仙山來絳節雲海戲羣鴻

問小兒隊

六樂充庭九賓在列何彼垂髫之侶欲陳振袂之能必有來誠少前敷奏

小兒致意

臣聞正月上日萬彙所以更新羣臣嘉賓四方於是觀禮雪方占於上瑞風已告於先春及此良辰設為高會

恭惟皇帝陛下子來九有天覆兆民煥乎其有文章昭
然若揭日月安西都護來輸八國之琛南極老人出效
萬年之壽還圭璋於鄰使受圖籍於春朝擊石撝金奏
鈞天之廣樂跳毬舞索戲平樂之都塲臣等沐浴太平
詠歌新歲鼓舞咸韶之韻踰揚鳥獸之間未敢自專伏
候進止

勾雜劇

以雅以南既畢陳於衆伎載色載笑期有悅於威顏舞

綴暫停優詞間作金絲徐韻雜劇來歟

酒闌金殿既均湛露之恩漏減銅壺曲盡風流之妙望
丹墀而申祝整翠袖以言歸再拜天堦相將好去

正旦大宴教坊

宋子京

瑞管開華允集春朝之慶寶圭修好用交鄰國之歡乘
節物之載陽均宴慈而飾喜羣情胥洽盛際難諧伏惟
尊號皇帝陛下誕受瑤圖丕承峻命右人文而徇鐸偃
神武以止戈百穀順成東戶之餘糧在畝二儀欣合甘

泉之衆瑞如山乃至刑措園扉仁孚行葦湛安瀾而有
謚廓壽域以無疆眷言韶籥之初兼重使華之享天臨
黼座星拱翠蕤治世諧音並奏承雲之曲仙倡偶妙爭
趨平樂之場天酒流甘君庖飫美玉宇來風而增麗金
徒把箭以方徐紛湛露於加邁霽需雲於設席臣幸觀
鐫飲均抃堯仁雖愧匪才敢進口號

歷啓新年霽萬祥詔開慈宴順三陽紫雲度曲調天樂
北斗回杓揖壽觴帝澤普臨春自暖人心歡極日先長

拭圭講好，多儀備永，奏威顏對未央。

勾合曲

天華玉色方宣樂，以推恩鷺羽鴻儀儼雍容，而在列式順九陽之令宜，陳四上之音徐韻宮商教坊合曲。

勾小兒隊

靈屏昭坐辟丹地之纖塵，朱鷺俄軒促一庭之疊鼓，宜命垂髫之列並呈投袂之妍，上悅天顏教坊小兒入隊。

隊名

遊童歌美化善舞慶豐年

問小兒隊

翩翩矩步粲粲華衿諒非舞勺之儔容是浴沂之侶既
造庭而綴舞盍駐籥以陳辭少進天堦相將好去

小兒

上日開春舉會同之盛典馳輶展贄重南北之歡心喜
聘禮之斯成祈宴賓而晉樂辰居祕殿霧集一簪藻叶
氣以乘時昭亨期之累盛伏惟尊號皇帝陛下文思邁

古濬哲當天乾坤不宰以為功日月常新而啓旦梯山
航海藹遐裔以同歸溫洛滎河擁鴻休而有煥屬以下
風改煦莫朔暢勾萌必達之宜當慶賜遂行之始羽觴
玉斚稱萬壽於堯封雲節薰琴合九成之鈞奏鳧藻之
情已洽露蕭之渥方濃臣等並愧髫齡欣逢聖世願進
幢竿之伎仰參舞羽之行未敢自專伏候進止

勾雜劇

麗服整容崇牙眩采暫闕來雲之妙少留曳蠻之行俾

優伎之參呈奉皇情之式喜宮商徐韻雜劇來歟

放小兒隊

鳳簫更奏雞刻潛移幸資折俎之歡已徧流風之態各
齊綴兆徐整巾幘再拜天堦相將好去

集英殿秋宴教坊

王岐公

臣聞高廩登秋美棗盛之已報需雲命宴嘉飲食之維
時况寶歷之逢熙復皇居之乘豫樂已羣臣之飫翕同
萬物之和恭惟尊號皇帝陛下德邁前王仁敷中宇虎

斨犀甲韜兵武庫之中桂海水天獻賁彤墀之下邦有
休符之應民躋壽域之康侯爽氣于重霄置清觴于別
殿下羣珍之鵷鷺發和奏之笙鏞于時日上扶桑風生
閭闔度芝蓋於丹城降金輿於紫闥百獸感和來舞帝
虞之樂羣生遂性如登老氏之臺固已追平樂之勝遊
掩栢梁之高會臣謬參法部獲望清光靡揆才蕪敢進
口號

翠輦鳴梢下未央千官齊望赭袍光霜清玉佩中天響

風轉金爐合殿香仙仗忽驚蓬島近晝陰偏度漢宮長
年年萬寶登秋後常與君王獻壽觴

勾合曲

露泛帝觴凝九秋之顥氣星聯朝升燦初日之長暉方
魚藻以均歡宜簫韶之合奏宸遊正洽樂節徐行上悅
天顏教坊合曲

勾小兒隊

燕觴飛羽方歌湛露之詩廣樂挺金已極鈞天之奏宜

命游童之綴來陳舞佾之容上奉皇慈教坊小兒入隊

隊名

紅英鋪禁妃絳節引仙童

問小兒隊

宸庭廣御仰佻太紫之纏鈞樂更和曲盡咸英之奏何處采髦之侶輒趣文陛之前必有所陳雍容敷奏

小兒

臣聞舜帝深仁衆極慕羶之樂周家盛德時歌在藻之

娛矧逢下武之期屢洽登年之瑞張君臣之廣宴煥古
今之多儀恭惟尊號皇帝陛下躬神睿之姿撫休明之
運禮樂兼於三代文章邁於兩京矧乃武庫韜戈戍亭
徹候百蠻奔走南踰銅鼓之鄉萬里謳謠西出玉關之
路今則清商應律滯穗盈疇奏肆夏之音事軼元侯之
享詠嘉魚之什禮交君子之歡足以崇勝會於難追騰
頌聲於無既臣等生陶醲化謬齒伶坊雖在童髮嘗習
舞干之妙輒趨君陛願隨樂節之行未敢自專伏候進

止

勾雜劇

華旌佐影觀童舞之成文畫敵收聲識鈞音之終曲助
以優人之技卜為清畫之歡上懌宸顏雜劇來歟

放小兒隊

銅壺遞箭屢移宮樹之音鷺羽充庭久曳童髦之綵既
闕韶音之奏難停舞綴之宮再拜天堦相將好去

勾女弟子隊

華簪炤席再嚴百辟之趨寶幄更衣復覩中天之座宜
度仙韶之曲更呈舞袖之妍上奉皇慈兩軍女弟子入
隊

隊名

宮錦祥鸞下仙韶采鳳來

問女弟子隊

金徒緩刻延麗日於壺中翠羽飛觴醉流霞於天上何
仙姿之綽約叩丹陛以踟躕惟有剖陳近前敷奏

女弟子

妾聞候凝霜降屬百工之告休歌起鹿鳴見羣臣之合
好矧萬幾之多豫復千載之盛期啓燕良辰騰歡綿宇
恭惟尊號皇帝嚮明紫極儲思巖廊邁三皇五帝之風
紹一祖二宗之烈候亭相屬不齎萬里之糧年廩屢登
又美曾孫之稼時及授衣之候民多擊壤之禧廣慈惠
於前儀慶昇平於茲日玉觴盈醴均流湛露之恩翠簾
擬金合奏洞庭之曲感福休於靡極召和樂於無窮妾

等幸遇昌時預陳法部舉聽鏗純之節來恭蹈厲之容
未敢自專伏候進止

勾雜劇

鸞拂宮茵極七盤之妙態鳳儀仙曲終九奏之和聲方
鐫飲之窮歡宜秦優之進技宸顏是奉雜劇來歟

放女弟子隊

宮花剪綵恍疑天上之春海日銜規忽覺人間之暮宜
整羽衣之綴却回雲島之游再拜彤庭相將好去

集英殿秋宴教坊

元絳

臣聞灝氣澄爽當金飈沆碣之時巖廊穆清乃黃屋燕
閒之日肆陳廣會申惠庶工慶盛世之熙隆決輿情而
鼓舞恭惟皇帝陛下九乾毓粹三象儲精丕承累洽之
基茂建大中之治縱橫文武聲教塞于天淵出入聖神
威靈震於戎狄方且輯瑞而朝羣后垂筵而揖三皇光
圖麗史之祥紛綸而洊至軼漠踰沙之貢竭慶以相趨
運獨化以陶鈞寘懷生于仁壽屬商緯之邁暮方歲物

之順成持御大庭爰開高宴動詔蹕于丹禁集朝簪于
赤墀美樂在陳下九苞之鳳舞嘉觴來上騰萬歲之山
聲續卿雲復旦之歌合湛露晞陽之雅臣等叨叅法部
幸對威顏上瀆聖聰敢進口號

秋風閭闔九門開天上鳴鞘步輦來萬樂管絃流紫府
千官簪佩集鈞臺華胥雲霧凝仙仗南極星辰入壽杯
既醉太平均五福明良賡載詠康哉

勾合曲

金飈日爽慶嘉生登稔之祥玉簾天臨宣惠宴均懽之
澤宜按鳳韶之奏載賡魚藻之歌上奉宸顏教坊合曲

勾小兒隊

簫韶迭奏通天地以均和簪組相趨協君臣之同樂宜
命垂髫之侶來陳舞象之容徐韻宮商教坊小兒入隊

隊名

舞羽虞廷樂歌雲沛水童

問小兒隊

廣樂張庭華茵布地向爾童髦之侶來瞻宸扆之嚴必有叙陳分明敷奏

小兒

臣聞霜氣始肅登萬寶以順成金行當期奄四夷而率服乘蕭辰之爽徹開廣宴之光華親御九宸均懽百辟恭惟皇帝陛下至仁溥博盛德昭清獨觀萬化之原遐踵三皇之武振張禮樂垂王度于區中總攬英雄懽霆威于徼外神功廣運聖業永昌方黃屋之清居乘素商

之令序肆瑤席于黼帳下調輿于紫闥壽竿九行懽聲
動而六鰲抃鈞簫八閩和氣泱而丹鳳翔仰屬重熙誕
膺多福臣等當甫髫髻幸閱聲明習戲康衢嘗為于蹈
舞進趨文陛願效于伎能未敢自專伏候進止

勾雜劇

疊鼓凝簫未已九成之奏垂髫佩韋暫分八佾之行宜
陳優戲之容上奉威顏之樂再更妙引雜劇來歟

放小兒隊

金胥漏緩玉案香濃天酒千鍾眷簪紳之具醉童衣五
綵促步武以將歸再拜天堦相將好去

勾女弟子隊

日轉彤墀香飄黼座宜旅陳于舞綴以仰奉于宸懼上
悅天顏兩軍女弟子入隊

隊名

承雲鈞籟合回雪舞袿輕

問女弟子

翠華日麗玉殿風清飄然妙舞之容來此丹塗之地帝
暉在望晝漏已移必有叙陳分明敷奏

女弟子

妾聞周詩既醉工歌均五福之祥漢宴無譁國禮重九
儀之序方戒肅霜之候特推湛露之恩百辟相趨三靈
共悅恭惟皇帝陛下握樞臨極乘籙御乾道昭五聖之
光孝奉兩宮之養聰文若古動雲漢之明回智武如神
馳雷霆之震赫羌戎率服稼穡阜成當秋籥之澄凝方

政機之暇豫轉清蹕于黃道集華簪于赤墀汎齊千鍾
共享衢樽之美咸池九奏具聞天籟之和維茲燕愷之
娛屬是休嘉之會宴等宴陪樂府得踐宮途望咫尺之
威實欣于天幸効蹕蹕之舞願奉于宸懼未敢自專伏
候進止

勾雜劇

舞佾廻翔已奉建章之會倡俳調笑宜來平樂之場上
悅天顏雜劇來歟

放女弟子隊

香凝黼幄聽玉漏之頻移日轉文茵顧霓裳之久駐已
盡七盤之妙宜還三洞之遊再拜天堦相將好去

集英殿秋宴教坊

蘇子瞻

臣聞天無言而四時成聖有作而萬物覩清淨自化雖
仰則于帝心豈弟不回亦俛同于衆樂屬此九秋之候
燦然萬寶之成吾王不遊何以勞農而休老君子如喜
則必大烹以養賢恭惟皇帝陛下孝通神明仁及草木

行堯禹之大道守成康之小心華夷來同天地並應以
謂福莫大於無事瑞曷加於有年南極呈祥候秋分而
老人見西夷慕義涉流沙而天馬來嘉興臣工肅陳燕
俎禮元侯於三夏諧庶尹於九成宣示御觴聳近臣之
榮觀臚傳天語溢兩廡之歡聲臣等幸觀昌辰叨塵法
部採謠言於擊壤助矇眊之陳詩仰奉威顏敢進口號
霜霏碧瓦尚生烟日泛彤庭已集仙藹藹四門多吉士
熙熙萬國屢豐年高秋爽氣明宮殿元祐和聲入管絃

菊有芳兮蘭有秀從臣誰和白雲篇

勾合曲

西風入律間歌秋報之詩南籥在庭備舉德音之器絃
匏一倡鐘鼓畢陳上奉宸顏教坊合曲

勾小兒隊

皇慈下逮罄百執以均歡衆技畢陳示四方之同樂宜
進垂髫之侶來修秉翟之儀上奉威顏教坊小兒入隊

隊名

登歌依頌磬下管舞成童

問小兒隊

大君有命肆陳管磬之音童子何知入造工師之末欲
詳來意宜悉奏陳

小兒

臣聞天行有信正得秋而萬寶成君德無私日將旦而
羣陰伏清風應律廣樂在庭占歲事於金穰望天顏之
玉粹沐浴膏澤詠歌昇平恭惟皇帝陛下天縱聰明日

金少日人
卷八十九
躋聖智無一物之失所得萬國之歡心雖擊壤之民固
何知于帝力而後天之祝亦各抒于下情臣等幸以韶
齏之年得居仁壽之域詠舞雩於沂水久樂聖時唱銅
鞮于漢濱空慙俚曲願陳舞綴少奉宸歡未敢自專伏
候進止

勾雜劇

朱絃玉管屢進清音華翟文竿少停逸綴宜進恢諧之
技少資色笑之歡上悅天顏雜劇來興

放小兒隊

廻翔丹陛已陳就日之誠合散廣庭曲盡流風之妙歌
鍾告闕羽籥言旋再拜天堦相將好去

勾女童隊

錦薦雲舒來九成之丹鳳霞衣鱗集隱三疊之靈鼉上
奉宸嚴教坊女童入隊

隊名

香雲浮綉宸花浪舞彤庭

問女童隊

清禁深嚴方縉紳之雲集仙音嘽緩忽簪珥之星陳徐
步香茵悉陳來意

女童

妾聞鈞天廣樂空傳帝所之遊閭闔清風理絕庶人之
共夫何仙聖靡隔塵凡仰瞻八采之威自慶千齡之遇
恭惟皇帝陛下乾健而粹離明而文規摹六聖之心人
將自化儀刑文母之德天且不違樂茲大有之年申以

示慈之會虞韶既畢夏籥將興妾等分綴以須審音而
作願俟上歌之闋少同率舞之歡未敢自專伏候進止

勾雜劇

絃匏迭奏干羽畢陳洽聞舜樂之和稍進齊諧之技金
絲徐韻雜劇來歟

放隊

羽觴湛湛方陳既醉之詩鼉鼓淵淵復奏言歸之曲蛾
鬟佇立歛袂却行再拜天堦相將好去

聖節錫宴

壽寧節

楊大年

木鐸揚而金革偃是八方富庶之時黃河清而里社鳴
乃萬乘誕生之日朝野共歡于無事寰區同慶於有年
星流電繞以呈祥沒羽浮琛而入貢四時大順正當北
陸以迎寒百辟歡呼共指南山而獻壽皇帝陛下誕膺
景貺奄有中區慈仁高掩於禹湯述作遠齊于軒昊萬
機甚衆孜孜不廢於躬親一物雖微汲汲惟憂于失所

制度更隆于三代封疆已極于四維坐明堂而玉帛駿
奔創延閣而圖書襃積若乃運九天之審算決千里之
兵機靈旂聊指于四戎便消氛侵尺詔暫飛于南國已
靜要荒陰陽諧玉燭之和兆庶享華胥之樂兩岐瑞麥
呈祥于隴畝之間三秀靈芝薦瑞于京畿之內至德上
齊于覆幬遺黎幸覩于昇平適逢載誕之辰乃是就盈
之月瞻風候氣咸奔魏闕之九重就日望雲盡仰堯眉
之八彩率土慶千秋之節上公稱萬壽之觴柏梁既揖

于衢樽蓮界仍開于鎬宴奏簫韶之雅樂張玳瑁之華
筵鵷鷺千官共祝後天之算簪裾四坐同瞻少海之光
伏以皇太子殿下位正青宮化行赤縣周寢見問安之
盛漢官彰視膳之榮大王大王國公國公稟秀天枝儲
祥日觀享魯衛疏封之貴掩間平好善之名首廳相公
社稷元臣朝廷舊德四海悉歸于陶鑄一人方賴于謀
謨樞密太傅志切公忠才推康濟掌樞機之重務運帷
幄之良籌東廳參政學洞古今望高中外演廟堂之成

算慰寰海之具瞻西廳給事識量淵深規摹宏遠效仲山之補衮同伊尹之調梅樞密給事道濟生民才高王佐蘊致君之明畧懷經國之遠圖樞密諫議闕里大儒傳巖良弼溫樹尤彰于縝密青蒲屢獻于謨猷復有鰲宮鸞掖之鴻樹雉首烏臺之高列武班乃韓壇之上將內職皆漢幄之近臣恭逢華渚之辰並同祗園之會今者天高氣爽日暖風和銅壺之漏刻初長玉笋之歡娛正洽香焚百和白龍宛轉于簷前樂奏九成丹鳳婆娑

于砌下且向精藍之地同銜樂聖之杯既觀天上之風
光須醉壺中之日月某叨居樂部幸對齋筵不度蕪才
上呈口號

九重宮闕起祥烟百辟稱觴鳳宸前殿上已聞飛玉笋
人間還許宴金田絲簧競奏咸韶樂簪組齊登錦繡筵
欲識君王壽多少天皇一萬八千年

勾雜劇

疊鼓凝簫已聽鏗錡之奏綵衣侂服未窮要眇之觀宜

命仙優上承帝悅金絲重韻雜劇來歟

放小兒

楓宸影轉花漏聲遲御醕飛觴已奏鈞臺之享童衣收綵却還沂水之遊再拜丹墀相將好去

勾女弟子隊

羽帳重披降氤氲之瑞氣玉觴再舉道宛轉之和聲百禮交修羣臣具醉正皇歡之霑洽宜妙伎之踰躑徐韻清商兩軍女弟子入隊

隊名

舞隨驚燕起歌落貫珠圓

問女弟子

翠鬢縹緲疑彩鳳之相將紅袖翩翩訝驚鴻之欲舞想
是蓬山之侶來同瑤水之遊必有叙陳分明敷奏

女弟子

朝野多歡遊豫為諸侯之度君臣同德燕樂慰嘉賓之心
矧屬昌期具陳前美恭惟皇帝功逾禹儉德邁堯聰發

號令於風霆炳文章于日月朱干偃武自彌怨於西夷
玉檢登封訖告成于東岱於時肅霜凝氣流火沉光瞻
黼帳之洞開命瑤觴而迭進仙徒緩箭宮綵飛花聖日
舒長助宸遊之多暇人心和樂感韶奏之新聲固以掩
高會于柏梁軼勝遊于平樂宴等逢辰有幸執伎非工
暫拂塵衣來造丹塗之地仰瞻法座願呈迴雪之容未
敢自專伏候進止

勾雜劇

萬樂高張既侑需雲之會羣臣具醉齊霑湛露之恩方
暫戢于舞容宜載陳於優戲天顏是奉雜劇來歟

放女弟子隊

金壺遞箭潛移寶晷之光玉笋飛筵屢極鈞天之奏宜
整五雲之馭却陪三洞之遊再拜天堦相將好去

興龍節前筵

方澤

電綵繞樞肇建壽丘之德瑤光貫月爰開若水之符夫
何神聖之誕期必有休祥之來契千齡協統九域胥歡

恭惟日躋光明天錫勇智運精神於宵旰克勤儉於邦
家咨伯益而舉臯陶繼有虞之嘉會虜樓蘭而焚老上
振大漢之天聲時惟守土之臣幸預加邁之宴傾心委
質徒馳北闕之誠就日望雲願上南山之壽

鄒律迎陽化景遲千年寶運應昌期春風合殿金貂列
曉日鳴鞘玉仗移萬國梯航皆入貢九重麟鳳亦來儀
堯仁已見覃區外願罄封人祝聖詞

興龍節後筵

星彩開祥浦女啓金天之號土行叶德河龍效玉圖之
文矧乎席六聖之洪基接千齡之盛統有生均廣異代
同符恭惟德懋法天孝隆述志萬幾之務躬攬于聰明
八紘之微悉躋于仁壽爰逢華旦獲覩玉儀載頒合宴
之私以及任土之義熾昌而艾適符魯頌之歌富壽多
男盡副封人之祝但臣妾等名標三洞跡寓十洲玉為
液而金為漿風為實而雲為子桃三千年而一熟荻歷
四劫而後成調九天之鈞動五雲之曲來茲仙侶上祝

堯年遙望闕庭輒進口號

西崑瑞葉下丹霄遙望鵷鸞拱赭袍長樂只知鐘漏永
朔方無復陣雲高光明不異千秋鑑顏色長如萬葉桃
來上君王千萬壽相將依舊鶴鳴皋

放隊

奏蟠桃之觴壽永祈于箕翼駕紫雲之輦路復返于蓬
萊再拜瞻天相將好去

聖節錫宴

陳無已

臣聞千齡接統爰開後聖之期萬類効祥宛同先佛之
日永惟昌運屬此興辰四海交歡同聲稱慶恭惟皇帝
陛下由獨智之聖以庶物為心審武自天文明燭物有
堯舜之道而博施濟衆有文武之道而居安資深刑政
並修登斯民于壽域干戈不用還千里之故封方當隆
盛之期迨此誕彌之日凡茲臣庶孰不傾瞻臣幸以賤
工邁斯盛旦敬効封人之祝顯陳大雅之詩

劍佩聲來合玉除
騏驎烟上暗金鋪
近臣先識天顏喜

九奏初知晝景舒東海為日將幾見南山稱壽已三呼
欲知帝力今多少醉舞行歌塞道塗

天寧節錫宴

祝咨謀

天地協氣共扶帝祚之昌星電發祥果見聖人之出慶
誕聳瞻于天上賜筵下逮于人間伏惟皇帝陛下晬然
龍鳳之姿皎若天日之表出應亨嘉之會生居泰定之
時况乃應鍾寶當陽月四序已諧于鳳歷十稔競秀于
天堦聖哲肇興中外咸覩殊域貢琛球之瑞在庭振鴈

鷺之容三十六宮盡生喜氣百千萬歲永御皇圖蓼蕭
祇荷于宸恩湛露廣開于綺宴拊金擊石咸稱北面之
觴就日望雲願獻南山之壽敢呈口號上祝皇齡
律動應鍾方協氣莫垂十葉正芬芳九天眷命符堯舜
四海傾心見禹湯山岳豈徒千歲久乾坤應有萬年昌
遐方稽首瞻天表更聽歌謳奉玉觴

天申節錫宴

鄭庶子

鈞天九奏遙瞻大帝之居嵩岳三呼敬效封人之祝幸

遇需雲之樂咸傾就日之誠恭惟尊號皇帝陛下道合
混元功叅太極寶慈寶儉聖人德何以加得壽得名天
子父尊之至授重華而協位執妙契以凝神得四表之
歡心享一人之至養未央殿上受皇帝之親朝長慶樓
前聚老臣而稱壽臣等歌詠康衢諏諧樂部仰日月光
華之旦載遇虹流聽雲韶揮布之音願陪獸舞恭陳口
號上祝鴻齡

一聲警蹕慶雲從向曉來朝大帝宮琴奏五絃歌永日

蕙飄六莢舞薰風未央前殿歡聲震長慶高樓瑞氣融
好是玉卮稱壽處堯衣端拱舜韶中

王母祝聖

侍宴瑤池猶記流霞之醉諸休甲觀又瞻繞電之祥從
西極以飛來頌南山而拜舞恭惟凝神物表觀象帝先
淵默端居尊為衆公之父逍遙清境德合昊穹之天視
黃屋而非心玩元珠而自樂永日方綿于堯歷薰風緩
度于舜琴五百歲春五百歲秋不數楚南之木一千年

花一千年實長觀閔苑之桃臣妾等久處龜臺曾陪駿
御採玉枝而卜壽贊寶錄以長生高詠洞秋敬陳善頌
青鳥傳呼急管催霓裳縹緲卜龜臺傾心願佐華封祝
舞袖飛從閔苑來弱木枝高長不老蟠桃花好幾番開
天皇一萬八千歲常向瑤池奉玉杯

當筵

流虹紀瑞僕景命于萬年湛露頒恩備太平之五福星
趨會升雲擁泰堦恭惟判府安撫樞使大資叅闕樞衡

清都斗輔未央前殿望太極之一星長樂雄藩擁東方
之千騎廟算夙攄于金版臚傳曾贊于玉卮對揚天子
之休均錫分茅之國彤墀曼阻徒傾就日之誠寶歷無
疆第祝後天之算

鬱鬱彤闈瑞氣浮生民稱壽滿皇州金吾萬卒嚴宮衛
玉筍千官拜冕旒已報偏師恢月壘更聞驍將落旄頭
下臣仰祝無窮算瓜瓞綿綿過有周

天申節錫宴

劉夷叔

南風薰兮適解吾民之愠離日麗也乃觀天下之成必
于是時篤生上聖惟簡之心可見以行與事而知澤在
四方祥來諸福伏惟皇帝剛健純粹徽柔懿恭紹開中
興光啓大業苟可致時之利者不憚屈已而行之念九
重夙夜之勤皆百世帝王之義止古公于岐下蓋不忍
殺人而君遵大舜於海濱將終身為親以樂酌諸興頌
應以寵休千八百成周之侯行皆覲會二九萬流訖之
紀坐閱始終臣等職在伶官身逢華旦英莖韶濩幸司

魯岳之觀日月岡陵請詠周詩之雅恭裁口號遠冒嚴威

智勇從天立太平福祥如海貯康寧色齊早應魁三象
夢與猶卑帝九齡不見貔貅窺紫闕遙知鵲鷺表彤庭
明年此日尤堪賞混一車書繞四溟

當廳

為天子之守拜二十石之榮方聖人之生致億萬年之
祝心之悃悞事絕華夷况牲牢饗餼皆冒上恩而皂隸

興臺詩同燕樂逢辰如此不醉謂何伏惟某官大奮英
謀亟躋膺仕職聯環衛曾窺覘于清光手付撫循益便
蕃于審渥某官載其家法列在王朝抱韋相之遺經盡
收餘烈贊魏公之舊笏豈在他人究觀許國之忠並見
愛君之篤舉樽相屬其樂未央殊異曩時細酌成都之
酒不妨拜賜共歡漢詔之酺某濫廁吹竽竟同擊節少
佐歡娛之洽輒裁口號之詞

邊庭無事飲為秋況復佳時樂事優野水添杯真不辨

欽定四庫全書

五言古詩卷八十九

南山獻壽若為壽可憐頗牧同時見恐有鄒枚後乘收
欲繼周人天保詠急傾滄海染銀鈎

王母祝聖

無率土以非臣豈天下三分有二祝聖人而使壽聞山
呼萬歲者三雖上下仙凡之殊塗而愛憎嗜好之一轍
敢鋪善頌允屬僉辭伏惟皇帝陛下稽古而行用乾以
則念祖宗家法之懿一本於仁混南北聖度之餘相忘
以道捐氣下勞于億萬好生乃及于細微法禹泣辜憲

湯開網惟上天之陰隲自我民之聰明俾熾而昌惟德
是輔臣妾邈處流沙之裔側聞大歷之興遙望闕廷敢
形歌詠

閭門啓鑰曉如雷雜沓羣仙佩玉來白鳳凌雲回葆羽
翠龍移日下宮槐九嬪侍輦趨文母百辟稱臣捧壽杯
遠憶瑤池舊安宴蟠桃花好又重開

當筵

簪裾儼序金石和鳴屬山陽歸馬之秋慶華渚流虹之

欽定四庫全書

五百家播芳大全文粹
卷八十九

三十

候少留賓徒願畢餘歡

詔分壽筭到邊廷將士榮見錫百朋試謂揮戈回落日
金壺有酒尚如澠

放隊

黃堂日晚紫府路遙瞻望台堦相將好去

天申節錫宴

方澤

勾王母隊

南陽真人紀赤光之照室西崑阿母隨青翼以造庭可

無大椿之辭仰祝後天之算

答

啓朱露之宮政三十六天之第一上翠華之壽期萬年
千歲以無窮敢傾葵藿之誠仰祝阜岡之慶

再問

既乘鶴駕來自蓬山願賡三壽之歌式贊九重之慶

再答口號

紫簡玉童又報流虹之旦瑤池羽袂再傾向日之誠不

辭弱水之遙來上南山之壽恭惟皇帝祇承上帝誕受
多方體乾剛獨斷之明得大道不爭之勝烽銷雁塞休
兵長閉于玉關香靄龍樓問寢每趨于長樂諸福之物
萃至九功之德可歌屬離火之方中政露囊之紀節要
荒異域長歸一統之模瀛甸來王咸預諸侯之燕傾心
魏闕拜手俛觴宮使閣學尚書禁路耆臣甘泉舊德久
勞侍從寓延閣以垂紳均佚燕申奉殊庭而福國知宗
中大振振信厚顯顯英豪棣華資糾合之功承統衍綿

長之慶提刑中大導揚德意宣布詔條同躋仁壽之風
協致太和之治五百年而並堯舜共際昌辰八千歲以
為春秋咸申善頌某等叨居末技獲奉歡顏輒採民謠
敢陳口號

久向清都侍玉皇袞衣猶帶御爐香樞星瑞色連天闕
湛露均恩到海鄉瓊弁充庭趨式燕玉卮前殿想清光
明年花發千官底獨押班頭立未央

天申節

鄭庶子

虹電呈祥表上聖誕彌之月乾坤等算効臣鄰祝頌之
誠運際亨嘉歡騰遐邇恭惟治隆三紀道冠百王無前
之績對天之休既已懋太平之業遊心于淡合氣于泊
乃從造物之遊萃萬幾庶務之勞受五日一朝之養惟
成功而不有宜得壽以無疆重華協濟于昌辰載夙忻
逢于穀旦神示薦祉日月增輝璇霄遙現老人星瑤池
下降西王母未央長樂年年觀清蹕之臨率土普天永
永効華封之祝臣等幸生聖旦叨備樂工遙望闕廷恭

陳口號

電樞星渚載呈祥鬱鬱葱葱瑞聖王鳳紀難逢千歲歷
龍章親奉萬年觴道高今古皇風遠恩洽華夷湛露灑
宰邑小臣何以報帝齡遐祝與天長

天申節

一人有慶正薰風入奏之時萬福攸同均湛露疏恩之
寵幸于今而親見攷歷古以難逢恭惟玩意希夷儲神
淡泊垂衣三紀德新日新而又新脫屣萬幾道大天大

而亦大與陰陽相為終始殫竹帛不足形容合萬國之
歡宗慶九重之嘉會誕彌厥月仰瞻北極之尊降康自
天永祝南山之壽但臣等叨為樂部喜際昌辰遙望闕
廷恭陳口號

真人降誕下中天好是薰風奏管絃四海幸逢千載會
兩宮齊賀萬斯年酒浮玉笋饒春色香噴金爐靄瑞烟
遙想龍章親上祝壽如山嶽福如川

五百家播芳大全文粹卷八十五

欽定四庫全書

集部

五百家播芳大全文粹卷九十

詳校官侍郎_臣劉躍雲

助教_臣常循覆勘

總校官編修_臣王燕緒

校對官中書_臣范 鏊

謄錄監生_臣劉 璫

欽定四庫全書

五百家播芳大全文粹卷九十

宋

魏齊賢

葉茶同輯

樂語

生辰

皇太子生辰致語

祝咨謀

電繞星樞上應夢龍之瑞虹飛霄漢允符吞鳳之祥皇

天垂象于母儀后土効靈于婦道事于宗社喜溢神人
恭惟皇太后殿下道高唐虞德邁任姒覩天之妹纘女
維華蘊懿姿于鳳龍降淑表于天日端有二南之化聿
追三代之風家道熙熙芣苢詠和平之美于孫蟄蟄螽
斯稱衆多之宜霓裳每陋于綺羅玉食久遺于滋味雖
塗山之莫及彼媯妫以奚攀下順坤元陰陽和而萬物
理上符乾造日月照而四時行時歷艱難天其眷佑鑒
輿遠歸于沙漠聖躬近抵於中華母子如初實為千載

之一遇室家相慶至於萬口以同詞衆識太任之心一
寬成湯之網恩覃動植仁冠古今恭惟皇帝陛下堯舜
聰明臯夔輔相行不忍人之政以若稽古之心道格蠻
夷孝動穹壤表章天性奉順母慈民阜兵銷旰食尚勤
于聖政冬溫夏清綵衣再戲于庭幃適當聖善之誕辰
用祝天齊之眉壽吹龍笛而擊鼉鼓奏鈞天之新聲壓
小槽而滴真珠盡瑤池之沉醉臣涵濡聖德生長太平
承家學之一經竊鄉書之兩薦目此鉅慶耳所未聞材

猷無補于朝廷草木難酬於雨露近瞻象闕阻奉瑤觴
同與海隅之人共慶華封之祝老人呈瑞顯萬壽之無
疆天德出寧賀一人之有慶臣不勝欣躍輒奏詩章

君王仁孝太常高又得師臣輔相舉太母鑒回天眷佑
老人星見斗雄豪夢熊事協生明主吞臯祥符產睿髦
祝壽幾何詞謾費擬尋王母問蟠桃

李丞相生辰

翁起予

門浮紫氣有青牛道士之遺風候屆朱明乃碧落侍郎

之誕日恭惟某官望高四海名重泰山言行為百世之
師文章擅一時之譽遠帝座千八百里雖緜臥于烟霞
侍國輔三十六年佇催還于禁陛某等忝居樂部叨預
伶官輒對台堦上陳口號

水晶簾閣捲薰風壽語聽傳絲竹中四海方將望巖弼
一溪那得擅文翁錦筵別有蓮花妙壽臉勻爭荔子紅
聞道明光已飛詔使君早晚對宸聰

高侍郎生辰

翁塞翁

梅折南枝早冠羣芳之首日旋北陸坐凝六子之功屈
此休辰宜生碩輔恭惟判府侍郎鈞璜流裔浮磬儲祥
長庚獨殿于列星巨柏後彫于衆植孕靈鄂渚渚文章蘊
得助之江山仗節淮壖威望有知名之草木爰持從橐
出鎮雄藩寬帝心宵旰之憂當方面古今之寄自非魁
宿曷勝風雲方太皞之司寒叶大人之占夢用申善頌
仰贊遐齡伏願侍郎三壽作朋百祿是荷功保汾陽之
終始德符周相之期頤維石巖巖長翊南山之壽泰堦

兩兩永扶北極之尊輒採輿言上陳口號

天上麒麟瑞世時隴梅初坼向南枝氣鍾沔鄂江山秀
名滿乾坤草木知節義中朝新柱石文章多士舊耆龜
願將元斗還公柄盡浥銀河作壽卮

生辰

劉中遠

地結雲冰初兆三乾之慶天開蓂莢方占六葉之祥蔥
蔥佳氣聳層雲靄靄瑞烟迎曉日願茲碩德生此令辰
恭惟某官參井儲休岷峨育秀早馳英譽挾東膠鷺序

之文晚綴清班，偉西掖鸞臺之聽。當急流而勇退，寧修翼而卑飛。息意弓旌，方懷丘壑。爰值始裘之月，慶逢孕玉之辰。座上羣簪朋盍，盡登瀛之侶。門前都騎鼎來，皆賀厦之賓。髮欺雪而重烏顏，渥丹而再少。頗為瑤池霧集，洛浦春歸。宜憑絲竹之音，仰祝松椿之算。

不貪青瑣鳳池頭，歸赴岷峨杖履遊。鵬翼遲回九萬里，椿齡迢遞八千秋。瑞庭驥子皆仙骨，密坐鵷行盡貴侯。此日德星兼壽宿，香醪莫惜泛金流。

生辰

劉夷叔

化日漸長梅花逢驛使之候高門有慶桑弧發男子之
祥式陳燕觴以樂勝事伏惟某官丰姿凝遠識宇粹明
早就師而讀一箱壯從官而非千里以大臣子常安州
縣之卑官異小人儒頗傳文武之大學竭來監郡自曰
隨緣時無少陵孰酬常侍之句世有品牧始識王祥之
才雖然歲詔之有餘固以德服而自化迨此生申及甫
來歌俾壽而臧況乎某官踵平勃以交歡指王謝而脩

好不憚多費酒如澠而肉如陵豈其固辭君當酌而吾
當賀忝居樂部得侍華筵欲佐歡悰輒呈口號

相逢樽俎定宜開況是今朝祝壽來蓮蕊釀新宜試飲
竹枝歌陋莫相咍家風久已門施馬仙骨懸知背似駘
留滯邊城且毋怪詔書行過楚王臺

宴餞

宴蔣丞相

陳德明

湖山改觀屈持斧之重權樽俎相逢對東鈞之真宰初

筵肆啓和氣一新恭惟某官秘殿上游黃扉宿望啓文
章而陟大位徧歷清華享富貴而歸故鄉尤高恬退已
趨歸東之詔佇膺虛左之求我某官繼石林先生之風
當繡衣使者之任暫開雄府首燕嘉賓左相飲如長鯨
足知海量郎官上應列宿幸接天光朱顏綠鬢兩相輝
明月清風平分破十眉環坐千指調絃追洛陽花酒之
春振江左衣冠之地某叨居伶部獲造均墀仰佐清歡
輒呈口號

闕

宴蔡侍郎范大卿

方澤

樽俎娛賓武子致加籩之享簪裾映座齊侯有撤席之
迎非惟備物以多儀實亦序賓而合好恭惟某官以碩
德雅望撫五嶺之重鎮某官以美才休譽居九列之清
班當玉綬膺受之初適使旆徘徊之地而某官肆筵敦

契張樂交歡宜有詩歌以資宴集

羣仙高步集琳宮
新命中來此地同
一座冠纓輝曉日
滿城歌吹咽秋風
傳聞嶺徼蠻羌
讐想見朝端器業隆
從此蒼生俱拭目
他時廊廟兩元功

宴楊參政歸第

晁子西

朝廷大臣既乘駟馬安車而去位
郡縣長吏當奉養牛
上尊以至門是固國家之舊儀
亦表里閭之盛事
恭惟
某官仕宦而遇明主
富貴而歸故鄉
名遂功成
蓋聞君

子之大道年高德劭實兼天下之達尊雖在燕閒所宜
優禮知郡敬以折俎陳于宰庭鯁祝在後而餽祝在前
敢忘本朝體貌之意廩人繼粟庖人繼肉庶幾諸侯
奉事之恭通判摠衣以趨正襟而立饋醬于大學須進
禮而示尊侍坐于先生願奉觴而為壽某等創逢高會
逖考前聞蘇轍城顛沛而不歸喜孫文懿安榮之復見
輒興善頌以抒下情

繞屋扶疎草木高曉張翠幕拂青霄初陳樽俎歌于夜

便覺園林如午橋慣見黃封曾賜醴少留赤舄未還朝
歌呼肯伴長安吏誰道尊嚴絕百僚

宴張節使

孫仲益

碧油開道共欣凱奏之還卓蓋迎門大啓賓筵之盛恭
惟某官名高八陣氣蓋諸公竒謀叅玉帳之籌妙東注
楓宸之眷方上聖推轂軍門之日正偷兒弄兵草莽之
中折箠一麾投戈四潰鐵衣百萬盡歸細柳之營珠履
三千坐肅紅蓮之幕知府待制共陳燕豆暫駐旌旄歌

鼓干霄竽壺塞路盡閣捲珠簾之雨舞綢生羅襪之塵
風起雪飛百花倒瓊艘之綠河傾水墮千葩摧蠟炬之
紅

秋風獵獵卷紅旌賊壘匆匆唾手平笑倚柁樓天上坐
臥聞鼓角地中聲九門合還追鋒去千里誰呼負弩迎
從此三吳傳勝事一時草木盡知名

宴汪帥

熊子復

制壺閩山屬機廷之大老經途建水遇冊府之高賢乃

留帥節之行以受侯藩之宴恭惟安撫樞使相公道闕
百勝功蓋兩朝早辭黃閣之除還就紱宸之列漢京三
輔比既彌于旌麾周國十連特改額于斧鉞擁被練數
千之卒經提封第一之州而我知府秘監敷文嘗接武
于書林亦協心于言路雖大帥過其府宜依節制之尊
然兩君在此堂得叙金華之舊霞盃漱灑星座熒煌輒
控心誠具陳口號

兩朝注意屬經綸勇退班仍寓紱宸曾幹帝樞通北極

暫分帥閫向南閩元戎道出吾新府太守郊迎是故人
飲量吸川何惜醉即歸廊廟東洪鈞

宴孫發運

方澤

四牡出疆昔聞占閩外之士千艘坐運今將半天下之
權清朝肇降于言綸故里先驚于衣錦伏惟某官高才
間世雅望偉時蔚然延閣之英蔓出漢廷之右倉箱充
實方圖餽餉之功使節光華夙有澄清之志而某官曲
敦嘉好式享多儀宜有頌歌以資宴集

玳筵高起見冰壺落
落英標竦玉隅持節
舊聞雄外屏
飛芻方見給中都
江城和氣先旌旆
淮浦秋風滿舳艫
看取漢家蕭冠業
莫稽雲際送雙鳬

宴酌獻供奉

方澤

樽俎娛賓武子有加籩之享簪裾映座齊侯致撤席之
迎矧將命以勤王且因時而薦廟欲序賓賢之禮多申
儀物之私恭惟某官久服禁聯夙膺宸眷天威咫尺思
致孝于鬼神使節光華示不忘于禮樂而某官肆筵敦

好張樂交歡宜有詠歌以資燕集

捲幕爐薰散瑞烟玉除人此駐華筵風流乍認周郎曲
感慨初聞賀老絃座上金璫春服麗樽前綵勝晚粧鮮
歸時紫殿方承宴重扈鑾輿向九天

宴王提刑

陳無已

西臺報政初聞五月之成東部向風遽失二天之庇是
陳七獻之禮以為一日之懽恭惟提刑大夫偉節照鄰
清風肖物有周公之才美謙以自居如顏氏之孤高敏

而好學用經明而治水以盛德而詳刑果自東藩就更
止道知府大夫敦平生之好盡賓主之情願陳衆志之
詞以紀一時之盛

闕

宴蔡總領

熊子復

專城擢拜于列卿民方懷舊給餉攝行于會府尹必告

新矧華要之鼎來與高明而契合恭惟奉使總領大卿
粹然家學籍甚時名政術敏妙而每存忠恕之心利源
疏通而不傷仁義之體紬書一札垂當清切之除寶帶
萬釘併受便蕃之錫清衷益注瑰望愈隆判府殿撰侍
郎德自羽儀政仍柯則惟庶民之安其里已遂優游則
兩君之在此堂宜偕燕喜敢陳俚韻用佐歡謠

大府堂堂壯帝京況同光武聚精兵郎星早即甘棠舍
卿月仍供細柳營游及有餘新妙手伐柯不遠舊能聲

一樽且為斯民樂早晚同歸傍紫宸

宴曾總領

熊子復

天塹宿帥任莫繁於總餉日畿輟漕選特妙于凝旒纔
津聘介之輶即按邊儲之瑣欣逢紫橐肇燕黃堂恭惟
奉使總領少卿奧學研幾周才濟劇洞明當世之大務
練達本朝之舊章冉求可使足民豈嘗忘禮樂之事孟
子將有利國必首陳仁義之言早踐郎曹更躋卿列揮
毫而奔萬象盍澗步于詞林操筭而制四夷姑究心於

糧道而我判府殿撰侍郎屬當共理喜奉周旋交臂而
玩石羊笑六代僅全之畧比肩而向金馬贊九宸恢復
之圖方洪量之吸川更麗華之舞雪敢陳俚韻上佐清
歡

卿月家聲妙一時才高自結紱宸知趨還便領閩中漕
遴簡仍供塞上師日貨萬緡登曉帳歲糧千艦集春期
笑談了此應殊拜且向黃堂醉一卮

宴統帥總卿

築城屯戍而邊境少安克制天驕之命連衆戰攻而餽
餉不絕並資人傑之才擁麾況輟于南宮傾蓋遂聯于
北府恭惟都統兩府太尉智研韜畧威震羌胡亞槐府
之官聯早隆上眷統柳營之帥律益峻中權奉使總領
大卿簡在帝心挺有祖烈卿聯應月次九禁之從途使
指占星通兩畿之餉道判府殿撰侍郎鼎來共理喜獲
周旋三壽作朋樽宜開于北海萬邦為憲會將集于東
都敢控鄙誠上陳俚韻

虎貔十萬可橫行偃甲猶存鐵甕城上將擁旌班二府
正卿持節餉連營鼎來況有東方騎疇昔仍傳北府兵
三傑同心須輔漢黃堂具共醉京清

宴陳統制

羣盜緣崖再決辰而假息偏軍擣穴一漏刻以成擒消
殺氣于郊原沸歡聲于城郭特起黃堂之宴少延白旆
之留恭惟統制舍人妙畧鷲沉英才驍逸環漢庭而入
衛戍閩郡以出屯漳水狗偷屢屈軍揮之指建山鼠竊

又勞馬蕪之筇叅議監承義薄雲天氣沮金石揚一麾
而假手曾諭寬條抗十乘以臨戎暫評婉畫茲出指縱
之畧遂收折馘之勲而我知府郎中雅度包荒清規絕
俗令行浹日即埽潢池之氛化成暮年復剪萑蒲之孽
推成功而不伐設備禮以有加通判學士督小隊以環
攻數推凶焰通判寺丞佐大藩而關決密運奇機于今
一會之歡自我五公之協溫如舜月之輯瑞爛若甘星
之連珠各圖萬里鵬搏共賦百川鯨吸但某等耳聽戎

捷目覩師還輒叙心懷聊獻口號

蝟戎螳斧謾崢嶸飛將潛軍一鼓平紅幕貴卿評妙畫
朱幡賢牧講歡盟西郊殺氣翻祥氣南國愁聲轉頌聲
更有屏星雙照座大家齊賦吸川鯨

宴平江太守

趙德莊

清香凝寢方需幕府之開紫氣度關暫屈牙樯之駐吏
民快覩城郭生輝恭惟某官名冠時髦才標國棟相門
有相妙傳經濟之文仁者安仁藹著中和之政一節勤

勞之終始十年進退之雍容偉論精深每前宣室之席
高情邁往屢壓承明之廬乃眷無門實今畿輔輟侍臣
之密綴峻閣老之清班景星夜明分野有慶膏雨時至
民物具蘇勝遊還付于詞人坐嘯復從于雅志江湖如
畫雲日既秋香徑傳呼榮何如於畫錦金庭清淨氣已
召於春臺某官仰瞻鄰寶之依俯念門闌之舊肅延玉
趾爰實羽觴倚巖桂于風簷埽井梧于月地新歌百轉
妙舞七盤主稱千金喜厚歲寒之託河潤九里恐聆暮

召之還某等叨列賤工親逢盛事願技能之無取係欣
幸之有餘上奉台堦敢陳口號

翩翩鷁首下皇州凜凜虹旌照碧油紫綬金章香案吏
紅柑白藕洞庭秋地靈自昔翔鸞鳳風化從今及馬牛
他日定知三節峻良辰姑為一樽留

宴新守黃侍郎

熊子復

京口要藩護神臯之浩穰宸心妙簡輟仙禁之清華驪
歌方徹于湧金騎吹已臨於浮玉恭惟知府殿撰侍郎

道醇而心正才大而氣剛胸次容萬頃之波毫端扛百斛之鼎第從臣之嘉頌既挾國華分刺史之真符更蠲民瘼旌麾鼎至衙府洞開江轉西來挹鄉國岷峩之秀山回北顧控邊城淮海之衝覽霸跡于孫劉想戎韜于蔡謝歛此大惠姑潤澤於侯方迄共外庸佇經綸于帝所奉使總大卿屬茲兼攝亦是交承楚尾吳頭屏翰固殊於他郡召前杜後肆筵乃會於此堂星座熒煌霞觴湫灩盡鯨吸百川之量壯鵬搏萬里之圖敢叙心期仰

獻口號

六聯士簡獨司戎亞旅才高試外庸仙殿西清聯寓直
神畿北固屬提封岷我遠挹鄉關秀淮海前遮敵境衝
聘傳已交戎索靖春風歸聽景陽鐘

宴新守

許仲啓

發輟蒲陽程自兼於便道把麾江右時適際於景風民
喜迎來禮均飲至恭惟某官韞浩浩淵淵之道擅渾渾
噩噩之辭昔聞二品之加官合施行馬今覩一門之羣

從俱詫登龍況毓秀端明學士之鄉而鍾慶元英先生
之胄有嚴撫仕於赫貴名俯就小朝廷之游嘗膺古子
男之寄果飛特薦徃貳元侯四明蓋等於蓬萊茂著海
沂之績千乘爰分于符竹甫頒庾嶺之春初靡俟于瓜
期即密聯于荷綴某官偶成願借久欲賦歸雖云託契
于交承何異相逢于邂逅奉三年之計豈吝于告新陳
九獻之儀尚幾于從厚滿泛宜城之酒靜凝燕寢之香
蔭楊柳之絲絲舞衣霑汗對芙蓉之面面歌扇生涼旋

及旋醕不妨談笑某等本無他技曷佐清歡號令弗更
此日仰瞻于李郭規隨共守他時同慶于蕭曹姑竭心
思僭陳口號

山路崎嶇學井參使君五馬至駸駸高標自偉千尋竹
茂闕人推一片金澤比春陽應遠暨樽中天祿且頻斟
交承契厚何妨醉端委遙歸便作霖

宴新守

高明父

九重飛詔新虎節于湖湘千里首途建隼旗于甌粵顧

此樵陽之幸適當騎氣之臨恭惟某官才閎經濟識造
淵微炳然文雅之宗師偉矣老成之儒表早被凝旒之
眷屢登要路之津未躡台躔更臨軫域且人生以五馬
為貴嘗聞杜老之詩而大夫至刺史則榮又見韓公之
序熒煌旆乘輝映渠庭而我知郡中大喜見巨賢挽留
行色凝清香于燕寢樂旨酒于嘉賓吹竹彈絲八音競
奏遏雲回雪羣藝俱呈願飛舉白之觴以介無窮之壽
惟此日之山城邂逅聊記清歡庶異時之金馬笑談為

先佳話既周散語上獻巴辭

聞說湖湘喜氣開望闔爭指二天來去程休憚臘猶閨
到日定將春共回行色經過輝巷陌清歡留住倒樽壘
主賓俱是和羹手便合江梅薦一杯

宴忠州交代

任子淵

古郡風流難繼宣城之行樂中年感慨易增太傅之離
愁屬成之終更幸竹符之合契聊陳豆觴少駐旌旄
恭惟某官岷下故家江東華胄早擅賢關之譽更收文

庫之功談笑風生高出塵埃之表胸懷徑直絕無城府
之深官路踐揚吏能藹著奉漢家之寬詔救巴郡之遠
民渤海潁川已上中臺之優最愚溪峴首上追前輩之
高風惠我一方逮茲三歲懷西山之舊隱泛南浦之歸
舟陶菊猶存雖有兒童之喜召棠勿剪能生父老之思
今則某官再念宗盟夙依德蔭論心道舊惟先世父兄
以來問政告新矧自今子孫之契愧金貂之後續惜畫
隼之前征請歌三終爰侑七獻月明後夜但同千里之

金匱山房集卷九
懷雨浥今朝且盡一杯之醉敢呈韻句仰佐清樽
撫字心縈遠俗懷歡聲騰沸繞巴臺朱幡且要雙旌住
畫舸誰令疊鼓催草滿春池思故國柳含朝雨送離杯
荊州長史長身健却望雲帆天際來

餞舊守

許仲啓

于蕃既効因為長社之留受代言適式遂甘泉之奏肅
陳樽俎少駐旌麾恭惟某官大雅卓爾不羣多聞古之
益友本慶源之派別芑仙李之根盤材號吏師學知世

務由燈火卷舒之力科第閱三十年積薄書期會之勤
仕宦至二千石此邦幸甚其治謂何恤下邑以捐金化
宵民之珥筆五兵自屏百堵孰賢論功鄙管氏之太卑
足用跨僖公之可頌臨深溪而清到底登峻嶺而氣橫
空臧厥臧則諸司形不擾之言止其止則半載慰無歸
之願洎茲解組共瞻東粵而去思佇見出綸正及南薰
而登拜某官廼由遠至若有數存宣布云初明虢州在
三之節交承攸寄守蕭相畫一之規義重通家禮隆設

金少隱先生集卷九十一
席芳蓮照水繁絃尚帶于春聲畫燭成灰妙舞謾縈於
別恨銀海空而有酒醉玉山側而要人扶某等執藝甚
庸蒙恩蓋久折梅逢驛使他時請問于寒暄迎佛送如
來此際愈難于啼笑敢陳口號盡述塗歌

獵獵高牙鵠首東雨餘歸計一帆風中和作傳誠斯寓
平理名堂治與同對酒告新應歷歷聞歌詁別莫匆匆
宗英入就鵷鸞綴玉陞金門有籍通

餞和州交代

孫仲益

朱幡皂蓋方班楚澤之春錦纜牙樯又泛秦淮之月簟
壺塞路簫鼓沸天紛然臥轍之氓居有挽髮之意恭惟
某官忠純許國愷悌宜民時推北斗之一人來擁東方
之千騎近長安之日久馳公子之心快楚臺之風聊共
庶民之樂爰膺妙簡移牧通都五馬攢花難駐雲霄之
步九芝塗檢竚霑雨露之新知郡侍御夙陳燕豆之歡
增重交承之契十眉環坐千指調絲長歌牽獨縈之縹
百柁倒瓊艘之淥渭城朝雨寄別恨于垂楊南浦春波

自
卷九
渺愁心於碧草

天涯萬里一尊同醉眼愁看月皎空畫角孤吹千嶂曉
綠舟橫曳半江紅啼粧盡帶梨花雨舞袖猶翻柳絮風
只有邦人頌遺愛棠陰繞屋自龍蔥

錢沈宰

趙德莊

暄風暖景方欣雛雉之鳴碧草綠波忽報飛鳬之引兒
童知戀草木含悽顧蕞爾以自憐念翩然而莫駐恭惟
某官名流第一間氣無雙雖蟠雲夢于胸中猶鬱麒麟

於地上時和頌美曾桃李之無言吏退詩成信江山之
無助逮春華之三變方聖政之一新民願借而報文課
當遷而奏可車輪四角徒多轍臥之思軺傳一封其若
賜環之召某官肅故交于新好啓華宴于芳辰撫嘉植
以賦角弓聽鳴嚶而思伐木歌翻金縷悵花霧之冥冥
醉倒玉山怨星輝之睽睽某等叨持薄技幸列下陳上
奉清歡敢獻口號

琵琶洲上百花開半是河陽手自栽試問解龜朝帝去

金史卷九十一
幾時持節為民來江山賴有詩千軸父老寧無酒一杯
寒食從今不數日邦人唯恐詔音催

餞吏部

張正己

天清月白三台正而少微明秋至風高九江空而渚鴻
去丹闕之鳳思侶蜀山之鶴離羣顧祖帳之鋪陳拔華
軒而餞飲寄一言于樽俎分萬里之舟車自古有行此
別為重伏惟某官孔門游夏吳產機雲初收釣鰲之鉤
便使屠龍之技魏公善課房杜獨知賈誼盡言絳灌爭

忌自魯再逐居東五年澤畔忘懷沙之吟天涯無逐客
之淚忠氣貫日誠心格天動仄席之綸音先假途于蘭
省某官舊虛徐榻曾共李舟朝開北海之樽夜挽庾樓
之客花溪錦里念歸雖得仙巢金馬玉堂回望即殊塵
世我心匪石有酒如澠臨岐雖贈千言執手不如一酌
自古潯陽送客愁荻花楓葉滿江頭今逢東海任公子
歸作商家傳野舟絳帳舊樽曾共醉輶車脂轄也須投
莫從對月乘明夜却憶南州庾亮樓

餞席帥

王望之

落花流絮換九十日之春光細雨和風送二千里之行
旆況是宣州幕府居多上澤賢才用捧離樽式張雅會
恭惟知府至仁厚俗雅量鎮浮湛千頃之洪波於人無
間散一襟之和氣與物為春自是鳳池之子孫出為蘭
省之英傑洊更都水久立便蕃政所臨而有聲才無施
而不可名績既輝於仕路富貴又臨於故鄉政已及瓜
民爭臥轍且以通判登高臨遠闢館羅羞講故事於長

絡陂頭設祖席於上東門外式宴且喜不醉無歸
使君千騎踏殘紅雅會清歡與衆同但有昔儒留父老
爭知竹馬負兒童日邊且喜身將近座上須教酒不空
鄭圃居民休臥轍漢廷即欲拜三公

餞江給事

翁塞翁

雁信催人動日邊之歸興鸞觴留客結濠上之歡游溪
瀉清聲山供秀色松桂重迎秋色芝蘭輕送薰風已拂
朝衣難忘祖帳恭惟給事內翰紫宮新使清鎮舊臣潁

陽之族望彌高江左之家聲不墜廣廷射策妙年遂擢
于甲科直筆代言真賞屢形于乙夜孤剛去國忠義忘
家地靈久借于稚川天意欲還于魏闕曹趨已入陳轄
載投倘非蓮幕之嘉賓敢屈掖垣之上客仍遷五馬添
作三龍未應亟問於刀頭將且盡歡於鼎足小亭共樂
辛拚醉于南州上國相逢冀望風於東閣敢無鄙句聊
助歡聲

玉虹千尺跨樵溪溪上神仙樂聖時剛與賓朋同宴喜

儘從君相問歸期
花香半匿紅蓮幕
酒暈偏饒白接羅
勸取東山十分醉
看看身在鳳凰池

餞沈卿

趙德莊

山川効祉有來膏
雨之和象緯宣精
歸止慶霄之舊借
留不遂遺愛若何
敢賡五袴之歌少
致千金之壽恭惟
某官珪璋粹美冰
鑑澄清宣布德音
積有神明之望雍
容朝著養成經濟
之才眷此甌閩兩
迂符節威令颺馳
于流馬光風日轉
于甘棠謝守詩名
自覺長城之重曹

公相業不妨醇酎之傾乃御秋風爰還帝所雖鳴玉鏘
金而計國抑登山臨水以愁予懷哉我民何以報德交
代某官肅陳高宴欸接勝遊酒累十觴增重金蘭之契
日移三丈坐觀桃李之陰遠追錦製之相因近想鵷行
之共集實子孫之永好為父老之美談某等名在賤工
目茲盛事輒陳俚語上侑清歡

秋入閩山等一州泉甘竹美鳳凰遊詩書舊說常丞相
文字今知沈隱侯寒菊未霜尤可薦衰蘭薄暮不勝愁

主人莫忘南來水乞與恩波日夜流

鹿鳴宴

鹿鳴宴

王望之

冠帶之徒以億萬計朋來幾擬于橋門賢能之士近七十人妙選可希于闕里四舉賓興之禮式諧樂育之勤解元先輩學賦春華氣橫秋鶚皆蓬海仙山之秀或泮林翹楚之英方賈勇以俱前遂先登于得俊聲音載好將遷上苑之喬頭角已生只待禹門之浪某官文章元

帥道德主盟大鈞廣播于無垠小子悉蒙于有造文翁
所至首隆學校之風常衮初來盡變詩書之俗速省賴
作成之德式遄敦勸駕之儀宮使閣學尚書禁路日星
英躔斗嶽率德表行儒宗推一國之尊論秀升材鄉老
藉六卿之重知宗中大闡前振後樂善好賢老成首揭
于典刑信厚踵承于標的提刑中大澄清風俗宣布詔
條周咨靡倦于詢謀勸勵每崇于文雅亦有同流之佐
共成贊治之功興賢興能登于天府載色載笑烝我時

髦賁然來思云胡不喜篚幣以將厚意維繫以永今朝
既有嘉賓共鼓瑟吹笙之樂請陳末技奏迴風舞雪之
容不揆蕪音敢呈口號

一札芝泥下九天紛紛袍雪滿英躔衣冠直比橋門盛
俊秀洋如闕里賢近歲江沙仍漲合明年禹浪好爭先
三山自是神仙窟誰作人中第一仙

鹿鳴宴

方澤

嘉魚罩罩乃邦家得賢之秋鳴鹿呦呦是郡國燕賓之

日矧樵川之豐壤據閩粵之上游臺嶺熙春瞰萬家之樓閣堂高斯美環千里之江山地勝才雄人繁物富佩儒服者數溢諸郡名天下者世有異人視草玉堂把鰲頭之管轄較文金殿奪龍首之香標況承六聖之昇平復啓千齡之景運下萬方之詔循三載之規鄉大夫興能郡太守勸駕恭惟知府望重當世才高古人文章超韓柳之前政事出龔黃之右暫憑熊軾即躍鳳池樂育存心至誠好善員冠濟濟咸遂于充庭賓佩鏘鏘盡陪

于佳燕氣象簇蓬瀛之景管絃揚龍鳳之音既榮座主
之提衡又慶門生之得路

畫戟門開喜氣新使君迎送鹿鳴賓廟堂他日陶鈞手
郡國今朝勸駕人早晚獨持黃閣柄須臾平步蕊宮春
諸生欲識恩門處昨夜台星拱北辰

鹿鳴宴

熊子復

起常伯以殿藩肇宣美化選嘉賓而充賦榮集初筵文
章推豹變之新禮樂按鹿鳴之舊伏惟諸解元先輩研

精聖聞振藻儒林獻賢能之書果偕於秋計陳治安之
策將造于春廷判府閣學尚書與學研幾周才濟劇曳
星辰之履早率屬於中臺擁江海之麾暫頒條于大府
奉使總領少卿懿文振古明識際空分潤浦之符士嘗
資於長育總淮壩之賦帝方賴于經營而況佐州得別
乘之賢分教有泮宮之冷併延舊舉同燕公堂萬里鵬
搏上亨衢而莫遏百川鯨吸盡洪量以何辭敢叙心懷
聊獻口號

由來京現出公卿化近神都久作成三歲賓興多雋茂
二天寵餞有光榮冬風偕計催行李春日傳臚聽集英
更祝兩公趨召節新年政地見諸生

時節宴會

立春宴

陳無已

東風應候欣逢草木之榮廣坐稱觴樂見太平之日恭
惟知府大夫英邁蓋世偉行絕塵名義甚都掩四科而
著目談笑諧理傾一座以趨風政既頌于中和樂復聞

於鐘鼓爰因令節肇啓華筵賓席雍容願上使君之壽
妓圍窈窕爭唱舍人之詩願紆下情敢獻口號

霏微臘雪不需塵收拾和陽作早春一座盡傾歸盛德
四時難得是佳辰鬢邊綵勝年年好樽下歌聲日日新
一笑難逢時易失杯行到手莫辭頻

上元宴

陳無已

佳辰行樂為平世之勝遊清夜觀燈與斯民而同好恭
惟知府大人寬猛相濟忠孝兩全聲烈慕乎四鄰氣節

蓋於一代爰因令節迨此暇時聊爲秉燭之遊用作豐
年之觀扶老攜幼樂聞鐘鼓之音疊足排肩願作衣冠
之會敢忘薄陋復此敷陳

歡聲喜氣塞康莊妙舞清歌樂未央此節定知隨意好
今宵端復爲人長粧成粉白生春色酒瀉鵝黃射燭光
報答風光須一醉從來千騎貴東方

上元宴

金碧交光疑竺國雨花之瑞宮商迭奏雜漁陽搥鼓之

聲況當三五之良宵獲盡四并之樂事宜為燕雀式協
時康恭惟某官嘉謀久著于朝端美政今傳于淮甸與
民同樂不醉無歸必資管籥之歡庶撤箭壺之漏嘉賓
列坐照紅燭以驚春妙妓成行鏗珠簾而唱月敢形歌
詠無訴觥觴

一夜蓬瀛綺宴開玳簾高捲月徘徊歌珠清響縈回雪
舞袖穠香散落梅十里笙簧喧巷陌百華燈燭晃樓臺
杯行到手休停手從聽銅壺箭漏催

上元宴

張正己

功名蓋世古來尚富貴
全家人世希森羅巨室之衣冠
修講四并之燕享伏惟某官
廟堂石柱夷夏藩垣素聞
德禮之宗每厚閨門之愛
父子篤而兄弟睦茲已家肥
鐘鼓設而琴瑟張非為酒困
況五三之燈夕冠九十之
韶陽人心與明月皆圓
禮席與良辰和會俯天樂而
兼人樂擅世榮而全義
榮莫辭終夕之清歡
茲蓋一時之盛事

使府門中別是天上元燈火樂豐年全家美祿隨春到
九列清昆似月圓裴度功名歸社稷謝安公子盡神仙
幾番福壽圖中慶八幅輕綃畫不全

寒食宴

張正己

祥烟瑞氣融融寒食之辰白日清天浩浩元戎之府三
載美成人意萬花粧出天心有鐘鼓之可陳肯韶華之
空度伏惟某官興周方召輔漢蕭曹精神動而造化隨
節鎮在而關河壯堂上幹乾坤之運幕中收文武之英

伏惟某官河朔名家山西世胄今日支江之使昔年唐
穀之雄再諭經綸主人懷君子之德坐觀桃杏佳辰感
錫宴之時忠臣以魏闕為憂遠民倚長城之固且同衆
樂拚醉清歡

元戎幕下會羣仙染出韶華紫府天桃杏欲燃非燧火
樓臺不是禁祥烟樂聲浮晝傳霄外春色隨花照眼前
只恐來年遇寒食樞臣入侍禁中筵

端午宴

張正己

薰風再至黃堂淨而日影長午候新榮大火中而天心
正萬物以得相見而樂四時適逢嘉會之亨誰對朱明
出司燕喜伏惟某官長安顯世西漢遺英一身六詔之
精神五路山川之衣食十年宸睠三度繒音雖留錦水
之濱已藉瀛洲之上西山採艾永堅醫國之心華省含
香先醉浴蘭之會

薰風和氣度黃堂星火中天白日長圖閣顯榮先鳳閣
芸香消息浴蘭香未歸先逐申侯燕既往堪嗤楚屈觴

待得金泥降真命中元自是賞秋光

中秋宴

張正己

遠來近悅黃堂靜而白日閒氣爽天高中火流而素秋
正欲盡賞心樂事無非美景良辰不陳燕享之娛莫叙
閨門之慶伏惟某官乾坤粹產海嶽靈儲獨寄朝廷之
重輕遠作西南之藩翰謂國所風正在始故家之理移
于官將寬嘒嘒之嚴必厚振振之樂列坐五侯之冠劍
同門萬石之恩榮飄然清風散作和氣烽烟塞外清如

四序之中秋福壽圖中更寫十分之明月永駐清輝之
照每如此夕之圓四海共天百年同日人生聚散願從
樽俎同歡家禮會和不隔關山相望

沉沉邊落鎖烽烟秋色中分八月天萬石子孫森斂履
五侯閨閭會神仙酒如天祿全家美月似人心百歲圓
只此門庭樽俎樂散為和氣滿山川

重陽宴

蘇子瞻

百川返壑禾稼登場新成百尺之樓適及重陽之會高

高下下既休，菴鍾之勞歲歲年年共。觀茱萸之美，恭惟
某官民人所恃，憂樂以時度餘力，而取羨財，因被災而
成勝事，起東郊而壯觀，破西楚之淫名，賓客如雲來四
方之豪傑，鼓鐘隱地，聳萬目之觀瞻，實與徐民長為佳
話。

一時柱石壯巖闔，更值西方落帽辰，不為游從誇燕子。
直將氣焰壓波神，山川尚遠當時國，城郭猶飄廣陌塵。
誰凭欄干賞風月，使君留意在斯民。

冬至宴

張正己

日躔南極來復見天地之心氣應黃宮履長為陰陽之
始震雷寂而羣動息坎水叙而百工熙共偶休辰道迎
蕃祉伏惟某官德性端茂襟靈靜淵章詞裁班馬之文
事業踵臯夔之迹出領蕃宣之重力追教化之純衮衣
又賴于彌縫鼎氣尚稽于調飫暫留鈞旆欸駐龜城扶
本擊強門有諸孤之卹嚴儲削禁民多五袴之謡載值
良辰式陳雅宴几筵並設克全禮物之修觴斚交飛念

重歲期之亞

昨宵初復地中雷共賀新陽七日來六出齊飛

一作岷

嶺雪一枝香動錦江梅細調樂律娛賓席同把仙醪送
壽杯況是舊年無事日醉鄉何惜玉山頽

冬至宴

劉韶美

律應黃宮直五音之退聽禮先鄉社喜衆雋之類升聊
為淨刹之游共納新陽之福恭惟某官誠通造化學貫
古今踐揚功業之塗慰薦邇遐之望坤維屏翰一新帥

閩之旌麾錦水金魚重見王公之面目簪纓並集散核
雜陳幸逢亞歲之佳辰況值叢祠之勝侶日行北陸已
添一線之長興在東山且拚千鍾之醉

瑞氣溶溶市寶坊賓游來自鄭公鄉簪裳雜遝星方聚
樽俎從容日乍長羅綺叢中金布地笙歌社裏玉分行
良辰莫惜瑤觴滿福海深深未易量

亭船宴

劉君引

楓落吳江冷梅開越水寒洞口相邀盡是劉郎之族岸

頭乘興共登王子之舟逍遙東道九華仙儼雅西階三
島客是日則有嗣宗叔姪靈運弟兄父子不減荀陳聚
德星于昭漢賓朋有同李郭羨仙舸于寒潭施肩吾席
上詩成江文通坐間賦就既而輕移畫鷁蕩一水以波
翻細疊靈鼉隱千巖而響震金谷異時之佳會無此好
溪山蘭亭昔日之俊遊未必皆親戚

溪水泠泠出武仙仙翁新上木蘭船不須曳入桃源去
此是劉郎小洞天

慶賀禮席

慶帥廳落成

張正己

萬兵開府仗使節以安邊百堵興工壯石公之營室方
即舊藩之燕肇修元帥之居役緩天時人和功倍伏惟
某官將垣人傑王國世臣百蠻仰之如神明南士愛之
如父母念公歸之無所永膺烏履之榮安固去故以取
新俾息勞而養佚櫟題數仞豈惟風雨之去除壽考百
年願與山川之悠遠

南邊千里拓蠻疆萬斧鳩材架使堂拔地土垣方橐橐
倚天鈴閣漸琅琅一時豈特除風雨千載應圖藉棟梁
竚看老成同衆樂振振公族會元章

慶新第落成

邵公濟

一室寧止克全幹蠱之心百堵皆興允遂肯堂之子念
克艱於為始宜無事于守成既獲烏瞻敢申燕賀伏惟
某人孝廉著望清白傳家弟兄怡怡尤敦于燕翼棟梁
奕奕不負于纘承既叶爾龜乃安斯寢雖不加于輪奐

實有好於人烏蔣謂有三徑之閑于公有高門之望良
朋萃止清酒既酤咸與樂來不忘禱頌

喬松脩竹亘蒼蒼綠水青山共渺茫衝雨不殊元亮住
一區堪配子雲莊也知桃徑留餘蔭更重金昆善肯堂
何用區區論宅相宜能厚德著流光

太師納孫婦禮席

范元卿

主組蟬聯仰周魯一門之盛繇蘿繾綣合朱陳二姓之
歡粲嘉幣以陳儀敞黃扉而啟宴歡傾輦轂喜浹烟霄

恭惟太師相公道佐中興勲高振古刻磨日月廓萬里
之塵氛洗滌乾坤還百年之舊觀宜上天之報施啓奕
世之昌榮兩國夫人氣襲清華德全溫靚興慶首行於
命婦瑤池夙冠于羣仙少保公相左棘參聯贊洪猷于
帝宰越國夫人赤繩密契際嘉會于天人載看丹鳳之
飛翔式此鳴鸞之嘉燕爭羨勲門之女來嬪上相之孫
勝事艱倚初筵特盛月邊環珮恍驚槐府之天高風裏
笙簫迴覺人寰之斗隔

圭組蟬聯慶一門
絲蘿繾綣燕新婚
蓬壺下降真仙子
槐府來嬪上相孫
錦瑟新翻雙鳳曲
玳筵分勸九霞樽
雲屏側伴齊眉案
長共春光映紫垣

禮席

汪彥章

奠幣告期配合既成于五兩治辰叶吉綢繆適迨于三星方親合卺之儀宜舉盃簪之宴恭惟某人淵源學海黼黻儒林妙選無遺始信青錢之價重新聲和叶悉知白雪之句高嘗振臂以當千幾擅場而挾兩騏驎一鳴

而望燕首越干將百鍊而剗革斬犀豈徒為江左之文
豪直欲繼洛陽之年少鄉人聳慕風高駟馬之門女黨
榮觀今作乘槎之客久欽俊譽願締率姻某人譜系清
高雅重崔盧之甲族封疆密邇何殊韓范之世昏舊傳
逸少之佳恨識長卿之晚初月乍隨於萸秀嘉期有協
于桃夭幸玉趾之來臨結金閨之永好如借津梁于星
漢大開樽俎於桃源衣縈栢子之香帶動九枝之燭謝
公庭廡益添芝玉之芳羸氏簫笙當有鳳凰之應薄技

上逢於綺席蕪詞敢侑于清觴


九賓珠履會春宵羽蓋參差次鵲橋應有玉臺供撫扇
豈無丹鳳應吹簫一枝仙桂香全近三月蟠桃色正天
看取樽前冠玉客乘龍喜氣近烟霄

會老堂

歐陽永叔

某聞安車以適四方禮典雖存於往制命駕而之千里
交情罕見於今人伏惟致政少師一德元臣三朝宿望
挺立始終之節從容進退之宜謂青衫早並於俊遊白

首各諧于歸老已釋軒裳之累却尋雞黍之期遠無憚
于川塗信不踰於風雨幸會北堂之學士方為東道之
主人遂令潁水之濱復見德星之聚里閭拭目覺陋巷
以生光風聲聳聞為一時之盛事敢陳口號上贊清歡
欲知盛集繼荀陳請看當筵主與賓金馬玉堂三學士
清風明月兩閒人紅芳已盡鶯猶囀青杏初嘗酒正醇
美景雖并良會少乘歡舉首莫辭頻



五百家播芳大全文粹卷九十